

17. oktober 2018

UKA 2018/49, 81, 140

Immikkoortortanut arlaannaannulluunniit naammattumik attuumassuteqanngitsumut whistleblowerit pillugit misissuineq nooqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Tillie Martinussen, Suleqatigiissitsisut)

Peqquserluuteqartarnerup akiorniarnerni suliniutit qanoq nukittorsarneqarsinnaanerat pillugu UKA 2019-imi nassuiaammik innersuussutitalimmik agguasseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Nassuiaammi aamma allaasereqquneqarput iluaqutissat ajoqutillu aamma aningaasatigut kingunissat inatsisitigullu tunngavissat, arlaannaannulluunniit attuumassuteqanngitsumik Peqquserlutsaaliuisussanik pilersitsisoqassasuuppat taamatullu aamma peqquserlutsaaliuisussat pillugit inatsisiliortoqassasuuppat, peqquserluuteqartarnerup akiornerni suliniutinik katersiviusussamik.

(Inatsisartunut ilaasortaq Steen Lyngge, Demokraatit)

Namminersorlutik Oqartussat ingerlatseqatigiiffini whistleblowerit pillugit aaqqissuussinermik eqqusseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Steen Lyngge, Demokraatit)

Siumut isumaanut naappertuuppoq whistleblowerimik aaqqissuussineq inuiaqatigiinnik ammasumik tamat oqartussaaqataanerannik aallaaveqartumik ingerlatsinermut periarfissiisuteqarnissamut.

Whistleblowerip suuneranik inuiaqatigiinnut qaammarsaassuteqarnissaq paasititsiniaanissarlu Siumumiit pingaartutut isumaqarfigaarput. Whistleblowerimi tassaavoq soorlu inatsisinik unioqqutitsinermut assigisaannullu atatillugu suliffieqarfinni sulisunik avammut oqaatilliisinnaanermik periarfissiineq.

Whistleblower kalaallisut nassuiassagaanni imatut paasineqarsinnaavoq, inuk inatsisitigut unioqqutitsinermik paasissutissanik peqaruni isorisariaqartunilluunniit soorlu suliffeqarfissuarni, kattuffinni imaluunniit pisortat suliffeqarfiutaanni, attuumassuteqarluni nipangiussimatitaasussaagaluaruniluunniit ajortoqarpat illersugaalluni oqaatiginnissinnaanera.

Soorlu siunnersuuteqartut ersersikkaat 2015-imi Naalakkersuisut whistleblowerit pillugit aaqqissuussineq Namminersorlutik Oqartussat qitiusumik allaffeqarfianni pilersinnikuuaat, taamaammat aaqqissuussaq manna suli nunatsinni nutaajulluinnarpoq annikitsuinnarmillu periarfissaqartitsilluni – suli.

Whistleblowerimik aaqqissuussaq ammasuunermik, tamat oqartussaaqataanerannik kiisalu killilersugaanani oqarsinnaatitaanermik tunngaviit tamatta soqutigisagut pineqarput, aammalu inatsisinik unioqqutitsilluni ingerlatsinerit pinaveersimatinniarnearlutik, tamannalumi inuiaqatigiinni tamanut iluaqutaassaaq.

Siunnersuuteqartut oqariartuutaat eqqarsaatigalugu, arlaannaannulluunniit attuumassuteqanngitsumi inissiinikkut whistleblowerip aaqqissuuttariaqarneranut tunngatillugu Siumumiit soqutiginninnerput matumani oqaatigissavarput, tassani siunnersuuteqartut tunngavilersuutaat innersuussutitalugit.

Ukiuni kingullerni marlunni ikittuinnaat nalunaaruteqarnikuunerisa soorunami annerusumik peqquserluttoqarsimanginneranik ilimanarsitikkaat Siumumi isumaqarpugut, taamaattorli

arlaannaannulluunniit attuumassuteqanngitsumi misissuisarnerup inissisimatinneqannginnera aamma peqqutaaqataasinnaanera Siumumi mattutinnginnatsigu matumuuna nalunaarutigissavarput. Peqquserluuteqartarnerup akiorniarneqarnerani suliniutinik katersiviusussamik arlaannaannulluunniit attuumassuteqanngitsumut inissiinissamik isuma Siumumi oqaloqataaffigissavarput, Naalakkersuisulli nassuiaammik innersuussutitalimmik suliaqareernerisa kingorna tamanna erseqqinnerusumik Siumumiit isummerfigissagipput matumani aamma oqaatigissavarput.

Aaqqissuussap pisortat ingerlatsiviini aamma atugaalersinnaaneranik siunnersuut Siumumi soqutiginaateqarsinnaasutut isumaqarfigivarput, tamannali Siumumi itinerusumik isummorsorfigineqanissaa kingusinnerusukkut pissasoq innersuussutigaarput, Naalakkersuisut nassuiaammik innersuussutitalimmik suliaqareernerisa kingorna.

Siumumi inuiaqatigiinni toqqissisimanartumik pissuserissaartumillu aammalu peqquserlunnertaqanngitsumik ingerlatsinissaq pingaartipparput, inuiaqatigiit ikittunnguugatta periarfissarititat naligiikkannernissaat tamanut atuunnissaat naleqartipparput.

Taamatut Siumumiit oqaaseqarluta siunnersuutit pineqartut pingasut Inatsiseqarnermut ataatsimiititaliamut aappassaaneernissaat sioqqullugit suliarineqarnissaat innersuussutigaaqut.

Anders Olsen, Siumut